

OBILJEŽENO 150 GODINA OD ROĐENJA A. P. ČEHOVA

U srijedu 8. septembra na Filozofskom fakultetu je otvorena izložba fotografija posvećena životu i radu velikog ruskog pisca A. P. Čehova.

Izložbu su otvorili dekan Filozofskog fakulteta prof. dr Blagoje Cerović, Nj. E. Jakov Fjodorovič Gerasimov, ambasador Ruske Federacije u Crnoj Gori, i predstavnica Fonda "Aleksandar Solženjcin" iz Moskve, Tatjana Irinarhova, koordinator rada Doma Solženjicina sa zemljama Balkanskog regiona. U sastavu ruske delegacije bili su i Segej Fedjakin, vodeći naučni saradnik Naučnog odjeljenja Doma ruskog zarubežja, Vera Vladimirova, šef Odjeljenja izložbenih aktivnosti Doma Solženjicina i Viktor Leonidov, istoričar Doma ruskog zarubežja, istaknuti ruski bard.

Otvaranju izložbe prisustvovali su profesori i studenti ruskog jezika i književnosti, kao i predstavnici sredstava javnog informisanja.

Okupljeni posjetioци imali su priliku da pogledaju više od sto fotografija o životnom putu Čehova, majstora kratke priče i svjetski poznatog dramaturga. Izložene fotografije, kao poklon ruske delegacije, ostaju u prostorijama Studijskog programa Ruski jezik i književnost na Filozofskom fakultetu.



Predstavljeno je i više od trista naslova, koje je Fond poklonio Filozofskom fakultetu. Gosti iz Rusije izrazili su nadu da će knjige biti od velike koristi predavačima i studentima našeg Fakulteta.

U završnom dijelu ove manifestacije profesor Sergej Fedjakin iz Instituta za književnost "A.M. Gorki" održao je predavanje o stvaralaštvu A. P. Čehova, njegovom mjestu i značaju u ruskoj i svjetskoj književnosti.